

El Museum(s)pass

Una štrada par portà i študentes a conoše el sò pasà

‘L é oramai calche setemana che par radio e su par ra gašetes se sente parlà e se lieše de “Museum(s)pass”. Ades on acarò ve fei saé ce che ‘l é chešta bona noa: ‘l é un laoro betù aduna da ra Intendenza Ladina de ra Rejon Südtirol par conoše ra štoria e ra ušanzes de ra zinche vales ladines de ra Dolomites, portada inainte par mešo del conoše i musee. I à lourà aduna i musee ladis de San Martin de Tor, de Vigo de Fasa, de Gardena, de Fodom e de ra Regoles d’Anpezo. ‘L é štà fato ‘na štrada *didattica* de vijites dei musee; el projeto ‘l é štà fato conpain che fose un concorso par i tošate de ra seconda clases de ra šcora mešanese e el dura un an, fin al 20 de maso del 2003 e ra premiazion ra vien fata ai 6 de ŷugno. I colegamente i é tegnude da Olimpia Rason, betuda da ra Intendenza Ladina par podé coordinà el laoro.

Ra šcores ‘š à ciapà ‘na carta fata su, con ‘na šcheda de partecipazion da taià fora e mandà a ra Intendenza, canche ‘s à fenì ra vijites. Ogni študente ‘l à derito de ‘na šcheda, da sei toi drio, ogni ota che el và inze un de chište mušee; d’inultima i resta par ricordo, con dute i documente del projeto. El parsonal dei mušee azetarà i študentes e el i ogarà. Inze ogni museo vegnarà dà un’outra šcheda a ogni un. Inze ‘l é alcuanta domandes, conpain che fose un cruciverba: ra soluzion, che r’è segnada de un outro color, e ra vien fora del longo, su sié righes, r’à da èse segnada inze ra šcheda de partecipazion. Zinche leteres, conformes a cheres de ra risposta del cruciverba, ‘na ota fenì, eš betarà aduna ra parola ciae, che ra dà derito ai premie, tirade fora. Par el material de ra šcheda, vegnarà dorada inze ogni luó ra parlada ladina de chera val, voltada anche par talian, šò sote. Ogni museo el farà ra domandes su un tema deferente: el Museo de ra Regoles in Anpezo su ra paleontolojia, chel de San Martin in Badia su r’arheolojia, chel de Gardena su ‘l artejanato artistico, chel de Fasa su usanzas e tradizios, chel de Fodom su ra Gran Guera. ‘L ordin, betù coši, ‘l é ra štrada par ra vijites da fei.

El fin de chešto concorso ‘l é, cemodo che ‘l à dito ‘l intendente ladin de ra šcora Roland Verra, un pas concreto par bete aduna ra colaborazion de i Ladis, un firo che lea ra ladinità de ra zinche vales.

Elsa Zardini “Soriza”